

Paul Rusesabagina: Umuryango we wanze ushaka kumwunganira, ushyiraho abawo barindwi

<https://www.bbc.com/>



Paul Rusesabagina yeretswe abanyamakuru ku wa mbere mu gihe cy'umwanya muto, ntiyahawe umwanya wo kugira icyo avuga **Uruhande rw'umuryango wa Paul Rusesabagina rwatangaje itsinda ry'abanyamategeko barindwi** ruvuga ko ari bo rwemera ko bunganira Bwana Rusesabagina.

Kuwa gatandatu, umunyamategeko David Rugaza yabwiye bimwe mu bitangazamakuru mu Rwanda ko Bwana Rusesabagina yamuhisemo mu myirondoro y'abanyamategeko yari yashyikirijwe.

Kathryne Kurth umuvugizi wa "Hotel Rwanda Rusesabagina Foundation" yavuze ko uwo munyamategeko "atazwi kandi atifuzwa n'umuryango wa Rusesabagina" kuko "abogamiye ku ruhande rwa leta y'u Rwanda".

Mu itangazo yohereje BBC, Madamu Kitty yavuze ko umuryango wa Rusesabagina "watoranyije intsinda ry'abanyamategeko b'inzobere" ngo bazamuburanire.

Ntabizwi neza igihe Paul Rusesabagina - uregwa ibyaha byo "kurema umutwe w'iterabwoba" - azagezwa imbere y'ubucamanza, niba n'abo banyamategeko bazemererwa kumwunganira. Mu kiganiro kuri televiziyo y'u Rwanda ejo ku cyumweru Perezida Paul Kagame yavuze ku buryo Rusesabagina yagejejwe mu Rwanda, avuga ko byinshi ubwe azabivuga mu "rubanza rwe ruzaba ku mugaragaro."

Umuryango we uvuga ko "nta buryo Rusesabagina yahitamo ku bushake umwunganizi mu mategeko atabanje kubaza umuryango we".

Madamu Kurth avuga ko umuryango we watoranyije abanyamategeko barindwi bo kumwunganira, ari bo;

- **Gatera Gashabana, umwe mu banyamategeko bazwi mu Rwanda**
- **Kate Gibson, wo muri Australia**
- **Jared Genser wo muri Amerika**
- **Brian Tronic, wo muri Amerika**
- **Vincent Lurquin, wo mu Bubiligi**
- **Philippe Larochelle, wo muri Canada**
- **Peter Robinson, wo muri Amerika**

Mu nyandiko, Madamu Kitty yabwiye BBC ati: "Uyu munsu [kuwa mbere] mu gitondo ku masaha yo muri Amerika iri tsinda riratanga ikirego rirega u Rwanda muri UN". Avuga ko baregera ko ifatwa rya Rusesabagina "ryishe amategeko y'igihugu n'amategeko mpuzamahanga".



Perezida Paul Kagame yavuze "ikibazo cyaba cyarabaye", mu kugeza Rusesabagina mu Rwanda, "ari ukubeshywa"

Bwana Kagame ejo ku cyumweru yavuze ko "nta nenge n'imwe yabaye" mu gufata Rusesabagina no kumugeza mu Rwanda, ko "ari we ubwe cyane cyane wabigizemo uruhare kurusha undi wese".

Paul Rusesabagina azwi ku isi nk'umuntu inkuru ye y'uko yakijije abantu muri Jenoside mu Rwanda yashingiweho hakinwa filimi "Hotel Rwanda" yamenyekanye cyane ku isi yasohotse mu 2004.

Rusesabagina ni umukuru wungirije w'ihuriro ry'amashyamba ya politiki atavugaga rumwe na leta MRCD-Ubumwe, ihuriro rifite umutwe wa gisirikare wa FLN ukorera mu burasirazuba bwa DR Congo.

Mu 2018, umutwe wa FLN wigambye ibitero ku butaka bw'u Rwanda ahegereye ishyamba rya Nyungwe, ibitero byaguyemo abantu.

Ibyaha aregwa bishingiye ku byo leta y'u Rwanda ishinje FLN. Rusesabagina ntaragira icyo avuga ku byaha aregwa.